



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## "RAJA PEMERINTAH: PENIMBANG TARA YANG ADIL LAGI SAKSAMA"

25 Jun 2021 / 14 Zulkaedah 1442

الْحَمْدُ لِلَّهِ<sup>1</sup> الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ، وَحْدَهُ لَا شَرِيكَ لَهُ. وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ<sup>2</sup> وَعَلَى آلِهِ وَصَحْبِهِ أَجْمَعِينَ. أَمَّا بَعْدُ، فَيَا أَيُّهَا الْمُسْلِمُونَ، أُوصِيكُمْ وَإِيَّايَ بِتَقْوَى اللَّهِ<sup>3</sup> وَطَاعَتِهِ لَعَلَّكُمْ تُفْلِحُونَ. قَالَ اللَّهُ تَعَالَى:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ فَإِن تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِن كُنتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا<sup>4</sup> (سورة النساء آيات 59)

### Sidang Jumaat yang dirahmati Allah,

Marilah kita bertakwa kepada Allah SWT dalam erti kata sebenar, dengan melaksanakan segala perintah Nya, dan meninggalkan segala larangan Nya; mudah-mudahan hidup kita akan senantiasa dilimpahi berkat dan kasih sayang Allah SWT.

Mimbar pada hari ini akan membicarakan khutbah bertema: **RAJA PEMERINTAH; PENIMBANG TARA YANG ADIL LAGI SAKSAMA**. Islam menyeru umat mentaati pemerintah pada setiap perkara yang makruf. Seruan taat kepada pemerintah digandingkan dengan perintah taat kepada Allah dan Rasul, iaitu, mentaati pemerintah, selagi pemerintah tidak melakukan perkara yang bercanggah dengan perintah Allah dan Rasul.

### Hadirin yang dirahmati Allah,

Malaysia terdiri daripada 13 buah negeri; sembilan daripadanya mempunyai raja berdaulat. Sistem berkerajaan dan bernegara berpayungkan raja telah berakar umbi di bumi ini lebih enam abad yang lalu, dan telah memberikan wajah dan identiti kepada negara kita. Kesultanan Melayu ialah lambang keagungan tamadun bangsa di bumi ini.

<sup>1</sup> Memuji Allah

<sup>2</sup> Selawat ke atas Nabi Muhammad SAW

<sup>3</sup> Pesan Taqwa

<sup>4</sup> Ayat Al-Quran



Ketika orang Melayu masih belum memiliki institusi politik yang tersusun, Raja-Raja Melayu berperanan sebagai juru bicara, menzahirkan suara membela nasib dan kepentingan bangsa. Penubuhan dan kemerdekaan Persekutuan Tanah Melayu pada tahun 1957, dicapai melalui perundingan dan persetujuan tiga pihak, institusi Raja, institusi rakyat dan kerajaan Inggeris. Ketika merangka formula membentuk kerajaan merdeka, rakyat menerima hakikat bahawa sistem beraja ialah sebahagian daripada sistem berkerajaan dan bernegara di bumi ini yang wajar diteruskan. Lantas, tradisi beraja di peringkat negeri turut diperkenalkan di peringkat Persekutuan, dengan mewujudkan seorang Ketua Utama Negara bergelar Seri Paduka Baginda Yang di-Pertuan Agong; diikuti dengan penerimaan sistem berkerajaan dan bernegara yang menggabungkan institusi Raja dengan institusi rakyat, berasaskan konsep raja berperlembagaan – demokrasi berparlimen. Peranan raja berperlembagaan dimaktubkan secara perundangan; sepuluh peratus atau 19 daripada 183 Perkara dalam Perlembagaan Persekutuan ialah Perkara-perkara berkaitan Raja, mengabsahkan bahawa raja berperlembagaan di Malaysia bukan sekadar satu simbol, tetapi mempunyai peranan bermakna dalam urus tadbir negara.

### **Sidang Jumaat yang dirahmati Allah,**

Ketaatan kepada Raja Pemerintah menjadi asas kepada kemakmuran sesebuah negara. Kaedah Fiqh yang masyhur menggambarkan situasi ini dengan matannya yang berbunyi:

تَصَرَّفُ الْإِمَامِ عَلَى الرَّعِيَّةِ مَنْوُطٌ بِالْمَصْلَحَةِ.

Maksudnya: Urus tadbir seorang pemerintah kepada rakyat hendaklah terikat dengan masalah.

Rasulullah SAW bersabda dalam sebuah hadis daripada Sayidina Abdullah bin Umar RA:

السَّمْعُ وَالطَّاعَةُ عَلَى الْمَرْءِ الْمُسْلِمِ فِيمَا أَحَبَّ وَكَرِهَ، مَا لَمْ يُؤْمَرْ بِمَعْصِيَةٍ، فَإِذَا أُمِرَ  
بِمَعْصِيَةٍ فَلَا سَمْعَ وَلَا طَاعَةَ

Maksudnya: Wajib bagi setiap Muslim patuh dan taat (kepada pemimpin) terhadap apa yang dia suka dan dia benci, selagi dia tidak perintah melakukan maksiat. Oleh itu, apabila diperintah melakukan maksiat maka tiada lagi kewajipan untuk patuh dan taat." (HR Al-Bukhari: 7144)

Sesungguhnya Islam telah menyuntik dimensi baharu kepada tatacara pemerintahan Raja Melayu, beralih daripada pemerintahan berpaksikan individu kepada pemerintahan



berpaksakan syariah, menegaskan dua konsep utama iaitu, adil dan muafakat. Hubungan batiniah raja dirangkaikan dengan Allah dan Rasul serta kedudukan para aulia dan para anbia. Islam menegaskan fungsi utama raja ialah untuk menjunjung hukum Allah, bahawa krisis akan terjadi jika perintah Allah diingkari, dan apabila raja memerintah dengan nafsu.

Pada era Kesultanan Melayu Melaka, daulat dikaitkan dengan tuah raja, diperlihatkan dengan negeri yang aman, makmur dan kaya raya, tanaman dan tumbuhan subur, ternakan membiak, dan rakyat bertambah. Hujjatul Islam Imam Abu Hamid al-Ghazali menegaskan agar pemerintah menyayangi rakyat dan tentunya rakyat akan membalas kasih sayang tersebut. Terkandung dalam kitab *al-Fawaid al-Bahiyah*, tulisan Nuruddin al-Raniri tentang peranan dan tanggungjawab seorang Raja; bahawa sehari amalan seorang Raja yang adil, lebih afdal daripada amalan seorang yang beribadat selama enam puluh tahun, bahawa raja yang zalim atau mengkhianati warganya dan tidak menasihati mereka untuk membetulkan kesalahan yang telah dilakukan, tidak akan mencium bau syurga. Nyatalah Raja Pemerintah mendukung amanah berat dan tanggungjawab besar; peranan baginda bukan sahaja dinilai oleh rakyat ketika berada di dunia, tetapi akan turut diadili ketika berada di Padang Mahsyar.

Raja Pemerintah tidak mengurus tadbir negara secara langsung tetapi berperanan untuk mengawasi berlangsungnya urusan tadbir yang teratur, amanah, telus dan berintegriti. Raja Pemerintah bukan monumen hiasan yang kaku, tanpa nyawa-tanpa jiwa; dan bukan insan yang buta penglihatan, pekak pendengaran dan bisu pertuturan. Raja Pemerintah dikurniakan Illahi dengan akal dan fikiran serta dilengkapkan dengan deria dan disempurnakan dengan hati. Segala apa yang berlaku adalah dalam ruang penglihatan dan pendengaran Raja Pemerintah. Oleh itu amatlah tidak munasabah jika institusi Ketua Utama Negara dan Raja Pemerintah di negeri-negeri diwujudkan untuk menyempurnakan tugas-tugas istiadat kerajaan semata-mata, atau dianggap boneka untuk menurunkan mohor perkenan kepada setiap dokumen yang dipersembahkan, dengan mata tertutup, mulut terkunci dan tangan terikat, diwajibkan tanpa pilihan memberi sepenuh perkenan tanpa soal atas apa juga perkara yang diangkat sembah kepada Baginda, apatahlah lagi jika nasihat tersebut tergelincir daripada landasan keadilan atau berunsur penindasan yang boleh memudaratkan rakyat dan negara.

### **Sidang Jumaat yang dirahmati Allah,**

Untuk membolehkan Raja Pemerintah merumus keputusan yang bijak dan betul, amatlah perlu untuk Raja Pemerintah mengamalkan budaya syura, budaya musyawarah, mendapat



fakta yang benar lagi tepat, bertemu dan mendapatkan pandangan seluas dan sedalam mungkin, daripada seramai pihak; menimbangkan pendapat ulama dan umara, intelek dan ilmuwan, warga tua dan warga muda, warga desa dan warga kota.

Pada waktu yang sama, amatlah penting untuk barisan yang bertanggungjawab dan diamanahkan menasihati Raja Pemerintah bersifat arif lagi berilmu, telus dan ikhlas, jujur dan benar, supaya Raja Pemerintah tidak diulit dengan mimpi palsu kerana diselindungi daripada fakta dan kenyataan, hingga memungkinkan Raja Pemerintah tersalah titah – tersalah langkah. Raja Pemerintah wajib disebarkan keadaan sebenar kehidupan rakyat dan situasi negara, agar baginda dapat memenuhi peranan sebagai penimbang tara yang adil lagi saksama.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

### Khutbah Kedua

الْحَمْدُ لِلَّهِ<sup>5</sup> وَكَفَى، وَأَصْلِي وَأَسْلَمٌ عَلَى سَيِّدِنَا مُحَمَّدٍ الْمُصْطَفَى، وَعَلَى آلِهِ وَأَصْحَابِهِ أَهْلِ الْوَفَا، أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ عَلَى سَيِّدِنَا مُحَمَّدٍ<sup>6</sup> وَعَلَى آلِهِ وَأَصْحَابِهِ وَسَلِّمْ تَسْلِيمًا كَثِيرًا أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>7</sup> وَكُونُوا مَعَ الصَّادِقِينَ.

### Hadirin yang dirahmati Allah,

Raja Pemerintah berperanan sebagai tonggak kestabilan, sumber keadilan, teras perpaduan dan payung penyatuan, juga berperanan sebagai mekanisme semak dan imbang antara cabang eksekutif, cabang perundangan dan cabang kehakiman demi menjamin berlakunya tadbir urus yang telus, berintegriti dan bertanggungjawab. Baginda wajib berada di

<sup>5</sup> Memuji Allah

<sup>6</sup> Selawat ke atas Nabi Muhammad SAW

<sup>7</sup> Pesan Taqwa



atas politik kepartian yang tidak memihak kepada mana-mana orang perseorangan atau kumpulan, demi membantu meningkatkan tahap keyakinan rakyat kepada sistem berkerajaan dan sistem bernegara berteraskan amalan demokrasi, berakarkan doktrin pengasingan kuasa.

Semoga Raja-Raja yang menjunjung amanah berat dan memenuhi tanggungjawab besar dilimpahi cahaya petunjuk Illahi, dikurniakan kekuatan untuk menzahirkan titah nasihat berteraskan kebenaran, dan pada setiap ketika, menegakkan yang makruf untuk memastikan taturusan negara dilaksanakan dengan amanah, telus, ikhlas dan jujur, agar negara kekal stabil dan aman dan rakyat hidup makmur dan sejahtera. Kepada Allah kita pohonkan doa agar Raja kita selamat bertakhta.

### Muslimin yang dirahmati Allah,

Mimbar menyeru para jemaah agar kita tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, hingga ke hari ini. Jagalah hubungan dengan Allah SWT dan sesama manusia. Makmurkanlah rumah-rumah Allah dengan istiqamah mengerjakan ibadah, terutamanya solat fardu berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>8</sup>  
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ، اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ<sup>9</sup>، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ،  
وَتَثْبِثْهُمْ عَلَى مِلَّةِ رَسُولِ اللَّهِ ﷺ. اللَّهُمَّ أَعِزَّ الْإِسْلَامَ وَالْمُسْلِمِينَ. اللَّهُمَّ انصُرِ الْإِسْلَامَ  
وَالْمُسْلِمِينَ خُصُوصًا فِي فَلَسْطِينَ، وَفِي كُلِّ مَكَانٍ وَفِي كُلِّ زَمَانٍ. اللَّهُمَّ ادْفَعْ عَنَّا الْبَلَاءَ،  
وَالْوَبَاءَ، خُصُوصًا وَيْرُوسَ الْكُورُونَا، وَالْعَلَاءَ، وَالْمِحْنَ، وَالْفِتْنَ، مَا ظَهَرَ مِنْهَا وَمَا بَطَّنَ،  
عَنْ بَلَدِنَا هَذَا خَاصَّةً، وَعَنْ سَائِرِ بُلْدَانٍ عَامَّةً.

<sup>8</sup> Ayat Al-Quran

<sup>9</sup> Doa Untuk Kaum Muslimin



**Ya Allah**, berkatilah hamba-hamba Mu yang melaksanakan tuntutan zakat dan menghulurkan wakaf, kurniai mereka rezeki yang berlipat ganda, serta sucikanlah harta dan jiwa mereka. Jauhkanlah golongan fuqara dan masakin daripada kekufuran serta jauhilah mereka daripada kefakiran yang berpanjangan. **Ya Allah**, berilah kami kebaikan serta keberkatan di dunia dan di akhirat. Peliharalah kami daripada seksa dan azab api neraka.

**Ya Allah**, kurniakanlah taufik dan hidayah Mu ke atas Raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ  
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾. فَادْكُرُوا اللَّهَ الْعَظِيمَ يَذْكُرْكُمْ،  
وَاشْكُرُوهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا  
تَصْنَعُونَ.